

四庫全書

集部

欽定四庫全書

乾坤清氣卷七

明 偶桓 編

古樂府

西樓曲

元好問 裕之

遊絲落絮春漫漫西樓曉晴花作團樓中少婦弄瑤瑟  
一曲未終坐長歎去年與郎西入關春風浩蕩隨金鞍  
今年匹馬妾東還零落芙蓉秋水寒并刀不剪東流水

湘竹年年露痕紫  
海枯石爛兩鴛鴦  
只合雙飛便雙死  
重城車馬紅塵起  
乾鵲無端為誰喜  
鏡中獨語人不知  
欲插花枝淚如洗

結楊柳怨

長樂坡前一盃酒  
鄭重行人結楊柳  
可憐楊柳千萬枝  
看看盡入行人手  
輕烟細雨綠相和  
惱亂春風態度多  
路人愛此風流樹  
無奈朝攀暮折何  
朝攀暮折何時了  
不道行人暗中老  
素衣今日洛陽塵  
白髮明朝塞城草

柳色年年歲歲青關人何事管離情春風誰向叮嚀道  
折盡柔條莫再生

留春曲

劉祁京叔

絮飛冷屑龍蟠玉花殞香摧鳳銜燭批頰深林叫新綠  
倚闌人唱留春曲春光欲去如死灰明朝煖風吹又來  
何如日日長相守典衣共醉花前盃殷勤留春春不住  
白日西馳水東去鏡中絲髮奈老何君當持盃我欲歌

征婦詞

青燈熒熒照空壁綺窗月上莎雞泣良人塞上遠從軍  
獨妾深閨長太息憶初癡小嫁君時謂君早晚擁旌麾  
如何十載尚輿隸東屯西戍長奔馳秋風戎馬臨關路  
千里持矛關上去公家事急傳令嚴兒女私情那得顧  
恨妾不為金韉韞在君腰下隨風埃恨妾不為龍泉劍  
在君手內飛光燄慕君不得逐君行翠袖爛斑空血染  
君不見重瞳鳳駕遊九嶷蒼梧望斷猶未歸況今沙場  
征戰地十人同去幾人回君回不回俱未見妾心如石

那可轉

題子陵釣臺

盧摯處道

雲山蒼蒼兮烟木稠石灘潺潺兮江水流故人兮冕旒  
先生兮羊裘使人皆先生兮誰其伊周使人不先生兮  
誰其巢由可仕止久速兮舍聖人將焉求清風一絲兮  
豈為名鉤蕉黃荔丹兮香火千秋岸下幾篙兮榮辱之  
舟先生一笑兮白雲收

秋夜曲

趙孟頫子昂

雨聲滴夜清漏長朱簾金幕浮新涼閨中美人動裁剪  
故羅衣袂生秋香東鄰剝棗西鄰穫旅館無人念飄泊  
餘不潦盡涵清輝芙蓉壓隄怨不歸墻根草綠陰蛾飛  
葡萄架空墮殷玉遙夜露寒生體粟暗蛩棲草鳴不平  
無絲絡緯空勞促夢魂苦短道苦長萬山深處非吾鄉  
玉蟲搔缸螢入屋去鴈來魚應可卜醒眼熒熒愁萬斛

杏葉黃

范攄德機

杏葉黃天雨霜穹窿攜日照八荒回光照見白玉堂堂

中美人雙鳴璫中宵抱被直西廂忠君愛親兩不忘奈何零露沾衣裳清曉樓頭見征鴈不如謝官歸故鄉

輓輶怨

門前水揚聲似雨幽人當窗碧絃語東里征夫去不歸一雙蛾眉鏡中舞年年井上攀輶輶勞心只恐秋葵枯他年種得長生草梅花落盡青青好

掘塚歌

昨日舊塚掘今朝新塚成塚前兩翁仲送舊還迎新舊



魂未出新魂入舊魂還對新魂泣舊魂叮嚀語新魂好  
地不用多子孫子孫綿綿如不絕曾孫不掘玄孫掘我  
今掘矣良可悲不知君掘又何時

楊柳青謠

揭傒斯曼碩

楊柳青青河水黃河流兩岸葦籬長河東女嫁河西郎  
河西燒燭河東光日日相迎葦簷下朝朝相送葦籬傍  
河邊病叟長回首送兒北去還南走昨日臨清賣葦回  
今朝販魚桃花口連年水旱更無蠶丁力夫徭百不堪

惟有河邊守墳墓數株高樹曉相參

長風沙夜泊

長風沙風沙不斷行人嗟行人嗟奈君何南風正高北  
風起大船初灣小船喜移船更近大船頭不獨風沙夜  
可憂但祝行人好心事長河何處是安流茅屋參差數  
株柳時平尚置官軍守青裙老嫗詫鮮魚白髮殘兵賣  
私酒魚賤可買酒可沽他人心事知何如

漁父辭

夫前撒網如飛輪婦後撻櫓青衣裙全家托命烟波裏  
扁舟為屋鷗為鄰生男已解安貧賤生女已得供炊爨  
天生網罟作田園不教衣食看人面男大還娶漁家女  
女大還作漁家婦朝朝骨肉在眼前年年生計大江邊  
但願官司減征賦有錢沽酒醉中眠雖無餘羨無不足  
何用世上千鍾祿

馬上郎

馬上郎沙撥浪織金出袖齊膝長花靴蹴踏銀鐙光紅

纓白帽紫絲韁三三兩兩雙鳴璫朝飲吳臺雪夜宿秦樓月酒酣却抱琵琶撥嬌歌刺刺隨手拍此聲此曲世罕聞只今天下無南北

車中女

車中女紅罽眾珍珠寶結間珊瑚茜裙盤蹙金鳳雛繡簾低坐青氍毹十十五五聯鳴駒大姨封吳越小姨贈秦號瑤池錫宴日西側紗籠照道高聲喝君王不愛畫蛾眉未數昭君好顏色

漢陽郎官湖歌

李洞既之

山翁薄暮醉酒歸杖藜迷却高陽池清風吹花綠陰倒  
我笑謂是秋雲移還乘貫月槎夜過郎官湖崢嶸星斗  
入江漢蕩漾槎影如鯨魚九華之真人邀我倒玉壺麒  
麟擘脯供行厨依稀仙樂在空際碧山四映寒蟾孤舉  
酒酌寒蟾明月下飲嫦娥俱霓裳拂雲錦萬荷瀉露瓊  
瑤珠麾旌掩靄羅烟空乃有玉皇所授之玉童風前飄  
飄曳廣帶對立十二秋芙蓉清香九曲銀河通真人綠

髮披天風錦袍玉雪照天地口說姓字安南公是公多  
逸氣畧與古昔賢豪同時能掃月色延我石室烟蘿中  
又言昔同張謂所遊地長嘯一覆丹霞鍾風吹仙樂度  
溪去我已醉卧香爐峯

舞姬脫鞋吟應制作

吳蠶八繭鴛鴦綺繡擁彩鸞金鳳尾惜時夢斷曉妝慵  
滿眼春嬌扶不起侍兒解帶羅襪鬆玉纖微露生春紅  
翩翩白練半舒卷筍箨初抽弓樣軟三尺春雲入手輕

一彎新月凌波淺  
象牀舞罷嬌無力  
鴈沙踏破參差迹  
金蓮窄小不堪行  
自倚東風玉階立

裴公亭吟

朝遊鴻濛津  
莫出天壇東  
手把天符書  
笑逐黃眉翁  
翁行宛若飛  
空龍條爍萬里生  
星虹翻然為我一揮霍  
樓觀盡入青冥中  
是中泉石玲瓏泉  
下禹穴滄溟通  
長林月色散輕霧  
潭影下燭玻璃宮  
坐來况值青春暮  
一日千娥獻歌舞  
水殿風縈鳳髓香  
濃綠迢迢出廊廡  
宮

墻亦有裴公亭溪毛映水連錢青飲酣起舞岸巾嘯太  
行落日春冥冥太行西來幾千里我自南來浙江水浙  
江潮回不寄君只憶橫空紫烟起岸烟起空氣氤不煩  
擊石呼將軍我行慷慨謝公去更欲長揖南溟君會稽  
山上落花裏扶攜醉入千峯雲

君莫舞

王士熙繼學

獸環魚鑰開九門長刀閃月如雲屯軍中置酒毛髮立  
楚漢瞋目爭乾坤楯上切肉衫血浣白壁入手玉斗破



悲風烈日吹秦聲赤龍將飛沐猴卧項莊項莊君莫舞  
以力取人天不與明珠美女棄若遺誰遣驪山作焦土  
戰旗高高日向曛天空雲散猶待君漢王夜走灞上路  
紀信成灰范增去

行路難

請君莫縱珊瑚鞭山高泥滑馬不前請君莫駕木蘭船  
長江大浪高觸天瞿塘之口鐵鎖絡石棧縈紆木排閣  
朝朝日日有人行歇棹停轡驚險惡饑虎坐嘯哀猿啼

林深霧重風又淒  
罨衣絆足竹刺短  
潛形射影沙蟲低  
昨夜雲月暗今朝  
烟霧迷青天蕩蕩  
紅日遠王孫遊兮  
草萋萋行路難歸  
去來振衣滌塵轉  
淮海故山之雲莫  
相猜行路難古猶  
今翻手覆手由人心  
江空月落長短吟

鱗鱗之車渡黃河  
汎汎之舟江上波  
漢使叱馭九折坂  
將軍橫旗下牂牁  
君不見長江大道  
人如蟻漏盡鐘鳴  
行不已又不見吳  
江八月人戲潮赤  
腳蹴踏潮愈高男

兒有志在四方憂思坎軻纏風霜不及江南豪富兒一  
生足不下中堂烹龍膏薦麟髓千金一笑如花美忽然  
對面九疑峯送君千里復萬里生鐵無光劍花紫薄霜  
碎碎月在水鷄鳴函谷雲縱橫志士長歌中夜起

古意

彈琴罷離聲置酒喜合并奉君藍田之玉卮涼州葡萄  
新釀成君醉不肯飲月華為誰明羅襦起舞錦茵動花  
落簾前驚乳鳳五更上馬雲滿天馬蹄却厭鳴珂重不

向章臺學鬪雞為通名姓入金閨銅壺滴滴宮漏晚鴛鴦飛來池水滿

白翎雀歌

虞集伯生

烏桓城下白翎雀雌雄相呼以為樂平沙無樹托營巢  
八月雪深黃草薄君不見舊時飛燕在昭陽沈沈宮殿  
鎖鴛鴦芙蓉露冷秋宵永芍藥風暄春晝長

吳中女子畫花鳥歌

吳中女兒顏色好洗面看花花為俏調朱弄粉不自施

寫作花間雪衣鳥綠窗沈沈春晝遲半生心事花鳥知  
花殘鳥去人不歸細雨梅酸愁畫眉

秦淮謠

雅勒呼正卿

天險淮南紀猶隔秦淮水水上石頭城城頭更戍兵如  
何愛歌舞坐待韓擒虎壁月委瓊枝歡娛能幾時

大堤曲

郎家大堤上妾住橫塘曲年少結新歡離別豈所欲日  
日望郎歸門前春草綠嫁時雙明珠繫妾紅羅襦纂製

遠遊履願諧比目魚路長不可致搔首空踟躕

賦得月漉漉送方叔高作尉江南

月漉漉泥在水送君歸幾千里泥在水月不明執君別  
難為情漉漉見月水深泥多飄飄遊子歲莫如何洞庭  
露下木落無波白雲在望鼓枻謳歌念子之來攜書一  
束茲焉言歸榮養以祿雄劍在匣弨弓在箠馳騁千里  
毋爾局蹐

烏夜啼

柯九思敬仲

故宮芳草春日低  
高林漠漠烏夜啼  
烏啼不斷愁深閨  
萬里封侯何足道  
玉顏如花夢中老  
東方欲曙烏飛去  
門外落花紅不掃

將進酒送方叔高之鄔子洲巡檢

君不見瀟湘之浦蒼梧山  
虞帝南巡去不還  
當時揖讓稱大聖  
但餘湘竹秋痕斑  
又不見汨羅江頭深碧玉  
屈原憔悴江頭哭  
皇天何高地何厚  
忠而被讒空放逐  
將進酒君莫辭  
聖賢亦塵土  
不飲當何為  
桃花水煖歌聲

度楊柳風輕舞袖垂  
況是驪駒促行役  
美人惜別低蛾眉  
有肉如陵有酒如海  
今日盡醉極歡娛  
莫待重來鬢絲改  
黃金束寶帶  
白玉飾雕弓  
將軍馬上意  
氣雄賦詩橫槊踰江東

趙孝子歌

愁漠漠歌嗚嗚  
哀鳴背雪聲  
相呼中原無書歲  
復晏有父萬里身  
羈孤兒欲從之  
重回首闥中有母  
母有姑側立乾坤  
去復住浩浩落日  
明江湖憶昔方保  
抱阿爺辭



家去倏忽三十年兒今壯已娶一朝祖母死揮淚青山  
濕却辭老母遡江湖風沙何處收親骨燕市逢先友迢  
迢指濱州濱州東去二千里城南亂塚那可求號天頓  
地淚成血天地為之色慘烈結髮誓死不去此髮解塚  
開還見碣兒能裹骨反如慕妻能守志終同穴君不見  
泣林冬出筍卧冰寒得魚古來純孝動天地長歌紀事  
誠非虛璽書旦暮旌其閭

和東坡四時詞

劉詵挂翁

燕子輕寒生院落佳人自捲猩紅幙樓頭風細墮楊花  
簾下日長添繡萼纈紋酒暈透瓊肌雙陸初贏笑問誰  
閒綰同心當戶立不知花影滿春衣

幙波微皺迴廊永酒闌手枕珊瑚冷槐影橫堦午簟涼  
榴花滿地風簾靜梅酸未試意先顰倦拂琵琶撥未勻  
紈扇半閒冰椀凍翠禽兩兩下窺人

瓶浸雙頭蓮顆綠畫闌閒却青奴竹微涼半下水晶簾  
坐看飛螢度高屋夜靜樓風時動扃隔牆一葉落虛庭

血色駕羅裁未就月明處處起砧聲

燭暗睡消聞畫角玉盆脂水紅冰薄深戶無風繡幄垂  
小瓶一片梅花落轆轤隔屋聲唧唧雲母香猊暈宿霞  
報道捲簾寒霧重午妝纔試翠鈿花

曉寒曲

趙楠茂先

曲闌廉纖杏花雨博山烟飛裊晴縷夢回錦帳春融融  
鸚鵡驚寒隔窗語美人曉妝雲滿梳柳風吹香入氍毹  
翠鬟裊裊綰不斷寶釵壓髻紅珊瑚了鬟捲簾采桃葉

驚起一雙黃蛺蝶

錢塘歌

楊缺子承

錢塘女兒十四五，鴉髻垂肩學歌舞。黛眉染得吳山青，  
爭把琵琶按新譜。婚姻全不遵禮經，典與豪家侑尊俎。  
數年限滿無相離，兒女相逢不相覩。妖嬈再入豪家去，  
臉色論財充阿堵。飯抄雲子魚作羹，高捲珠簾闔眉嫵。  
色衰嫁作良人妻，不事耕蠶願生女。徒聞禮樂百年興，  
吳越之風難復古。吳越之風難復古。

去妾辭

孫伯善

妾昔紅顏鮮抱綢十五年阿母云亡主中饋安排翁續  
鸞膠絃新歸主婦情未密陡然兩意生荆棘推將怨隙  
在妾身教妾彷徨留不得翁今愛妾空有心妾亦知君  
愛妾深自古亡家為顏色妾身不當千黃金回頭向翁  
語遺子留自乳浮雲有散時人生豈長聚妾去婦肯留  
妾留婦應去但願主翁琴瑟調妾身不恨無歸處

銅雀妓

周霆震亨遠

鄴城臺高餘久照陵草萋萋心尚少生前破賊嗔為奴  
却視閨門已傳笑虞淵那得日更東賤妾飲恨何時窮  
月朝望罷又十五不堪回首臨新宮宮中日日選歌舞  
先帝舊恩金屋貯淒涼銅雀閱年華羞見西陵陵下土

餅師婦

妾生不識分離怨餅師朝暮長相見宮中豈少貌如花  
何事王心在微賤洞房清夜懸明珠夢魂睍睍繞故廬  
餅師召入雙淚雨放妾偕老歡如初種花道傍貴雙蒂

庸奴包羞輕佻儷王心不惜恩海深一旦翻然悔初意  
春風落花香有無明月入水泥不汙歸來鄰媪笑相問  
世間亦有秦羅敷

畫角辭

何<sub>缺</sub>麟瑞

莫吹角吹得梅花片片落朝吹暮吹吹不了盤古不知  
坐成老童男童女求蓬山何如此器束之高閣間金盤  
擎露仙人掌何如敕斷此聲勿用響不知今日復明日  
兩鬢常常黑如漆莫吹角天寒歲晚情更惡

## 天馬歌

崑崙高哉二千五百餘里日月相隱避黃河發源下有  
渥洼水大宛羣馬飲其溼天馬下與羣馬戲產駒一日  
可千里滴汗化作燕支水國人縛橐為人置水際久與  
馬習不經意一朝却被人鬪繫張騫使還報天子天子  
不惜金珠與重幣期以此馬可上致大宛使人欺漢使  
致煩浞野樓蘭七百騎攻虜其王馬始至此馬初入天  
廐時一十二閑無敢嘶萬乘臨觀動一笑盛氣從此無



四夷君王神武不世出天產神物相追隨高皇手提三尺劍  
威秦誅項一指麾天下馬上得不聞取馬外國為龍如可  
豢龍亦物馬果龍種豈受羈徒令物故過半不補失輪臺  
一詔悔已遲此詩欲學旅獒可光武一牛亦足噓漢火

後天馬歌

建元天子不世出天相神武產異物有馬出在月氏窟  
寶劍之精乾龍之靈足如奔電目如耀星汗血雨洒駿

肉飈輕渴吻一飲黃河塵生昂首一鳴天雷收聲曾為  
伏羲出河負八卦曾隨穆王遠與西母會鸞旂屬車相  
後先龍盾虎韞八寶韉萬乘親臨拜甘泉穩馱玉輅壇  
壝前元鼎勒兵十八萬天子自將孰敢戰駿氣橫出立  
陣前百萬聞嘶股俱顫天缺此馬神哉沛西極龍媒望  
風退天子作歌暢皇明四夷竭蹙咸來庭天馬來帝作  
歌漢時此馬今更多

月氏王頭飲器歌

祝蕃直清

單于寶刀寒映雪月氏髑髏飲冤血泥丸真人辭絳宮  
麴生時能醉其骨閼氏夜帳葡萄香拍拍春霞艷秋月  
賢王起舞谷蠡歌傳呼歡笑兩耳熱燈前人影半闌殘  
燈後青燐已明滅持盃為爾澆嶙峋胡為對此傷精魂  
弓蛇猶能致惑疾智瑤豈是無心人頭顱如此當速朽  
生擒誤入仇家手忍將鳴鏑射頭曼吁嗟降王爾何有  
後來漢使浞水東猶待留犁撓盟酒

碎菟盆歌

甘缺茂實

河伯捲土歸河水相麓窰沒神工廢此盆貢入蓬萊宮  
監官篆記開元字中和外澤潔且明滿腹文章徧身碎  
初疑明月墜秋波白兔翻身毯寒毳又疑花底斷蛛絲  
蟬翼蜂鬚巧相綴秀山獨抱荆山輝溫姿欲吐藍田氣  
當時載酒沈香亭海棠絕艷生精神玉環微醉三郎醒  
暖風吹散梨園春白頭拾遺浣花老蹇驢破帽東西村  
却羨田家歌老瓦茅簷醉倒卧竹根富貴賤貧同逆旅  
地老天荒盆解語茅簷土屋化瓊樓花落玄都成菜圃

大家奴僕封公侯蓋世英雄散墟墓銅彝寶鼎不復出  
翠釜冰盤竟何去自憐壽考自珍奇玩弄乾坤逃劫數  
可以浮醴泉猶勝許由瓢挂樹可以盛羔豚猶勝金銅  
人捧露我觀古器思古人古人已矣難招魂十載興亡  
又今日人不識寶天應惜通玄道人聞見多君家舊物  
重相過後五百年且莫問急呼斗酒為盆歌

莫養虎

彭子翔

莫養虎飽則喜兮饑則怒莫養鷹飢則附人飽颺去鷹

去但亡恩虎怒將為冤不如團飯養雞狗能吠盜雞  
戒曉嗚呼世事反覆不可知狗或反噬雞亂啼

野鷹來

胡缺尊生

野鷹來霜風高山寒鳥死狡兔逃我有鮮肉肥爾膏軟  
皮為韝絲為條山中忍飢良獨勞野鷹來高高臺側翅  
側立何為哉當途猛虎闕我室赤筋細骨皆凡材野鷹  
來沔之水昔年種柳今如此巢危雛弱將奈何野鷹歸  
來吾望爾

瓊花上天歌

趙文儀可

朔風吹沙堆浪白二十四橋沈冷月顛風夜半撼蕪城  
雪萼瓊絲破空碧金瓶歲歲獻君王玉罌泛酒蓮花香  
明光殿暗沙漠遠人自無情花斷腸落藥飛天識天路  
何如拔樹飛昇去唐昌遊女再歸來城中只賣瓊花露  
江南停客吟如叫想像裁辭不成調天宮夜半按霓裳  
玉女擎花紫皇笑


明妃曲

譚見心

缺

夔江水千古萬古流漢宮三千畫圖裏夔江有女何曾  
愁邏迢檀槽雙鳳侶彈得孤鴻漢言語妾身薄命蛾眉  
誤萬里將軍夜城苦氈車似雪雪似沙淚洒胭脂成塞  
花君王見妾辭玉殿不曾見妾訴琵琶絃聲欲斷心相  
續自古有愁無此曲世人傳曲不傳心秋草年年漢墳  
綠





乾坤清氣卷七

欽定四庫全書

集部

乾坤清氣卷八  
十至

詳校官中書<sub>臣</sub>丁榮祚

助教<sub>臣</sub>常循覆勘

覆校官中書<sub>臣</sub>方大川

校對官中書<sub>臣</sub>葉莢

謄錄監生<sub>臣</sub>馬紹基

欽定四庫全書

乾坤清氣卷八

明 偶桓 編

古樂府

漢使謠

陳泰所安

海昏昏雲瑟瑟漢家歸使雲中發千騶萬騎歛如雷蛇  
子蛇孫鎖金軛天狼一墮天門開羲和走馬從西來

燕山雪

漢家將軍愁失道  
燕支半夜雙蛾老  
祁連千丈酸風高  
日日氈車翻海濤  
誰憐中郎齒如戟  
誰憐明妃髮如漆

秦淮月

沙頭薄暮生林樾  
烟水茫茫沙雪白  
女墻夜靜潮無聲  
惟有中天一片月  
年年故宮照禾黍  
年年商舫照歌舞

春愁曲

王沂師魯

花房泣露珠滴紅  
繡屏金鴨香濛濛  
鸚鵡喚遲梳洗晚  
遊絲撲蝶飛燕嬾  
藍粉染黃塗額好  
赤心莫擘庭前棗

虬鬚公子射麋歸，望覺雄心醉。中老別起高樓連苑東，  
鸞絃鳳竹幾春風。一自驂騑思故櫪，門前芳草年年碧。  
送春詞

黃金臺下東西道，紫燕矜誇銀勒好。長溝漾晴晴不盡，  
碧草迷人人易老。樓上迎春又送春，邯鄲女兒嬌翠顰。  
一聲鶗鴂鳳城曙，滿眼芳洲生白蘋。柔桑繞舍麥如尾，  
錦雉將雛梅結子。為問歸耕海上田，何如但索長安米。

陽春曲

楊花濛濛海波白十里香風飄紫陌流蘇寶網金陸離  
漢家帝子朝天歸葡萄美酒新勅賜蓬萊宮中綠衣使  
道傍縮首觀且避蹀躞玉鞭光照地大堤綠樹啼嬌鴉  
知是平陽公主家回首畫橋芳草暮蝴蝶不隨春色去

禽言

婆餅焦徒爾鳴黃雲茫茫與天平去年麥熟苦梅雨東  
疇西隴飛蛾生今年麥熟不得割去學精衛填滄溟婆  
餅焦無樂聲

蠶筐八隻脚新繭已上箔新繭上箔且莫喜門前催租  
吏如鬼小姑繰絲手不停夜畏碩鼠朝畏蠅織成匹素  
不中式姑嫂相看機杼泣

提葫蘆聲相呼去年賣犢出賦租江村酒賤無錢沽無  
錢沽酒莫作惡不到縣門身即樂

泥滑滑江頭路路上行人一回顧古云變理真謾語却  
是山禽管晴雨

李將軍行

隴西將軍年少時雕弓錦帶生光輝捲旗夜斫樓蘭帳  
赤鞍晝截雙雕飛曾經百餘戰屢出九重圍橫行遼水  
上殺敵榆關歸戍樓霧暗烽火滅沙場雪深救兵絕人  
渴斧冰飲馬寒抱鞍歌漢月凍欲死北風利如切魚腸  
寶刀斷燕尾蝨弧裂歸來藍田空白首銑衣換飲新豐  
酒酒酣射石沒金鏃夢裏鳴笳雜刁斗昔時偏裨皆奏  
功侯印佩出甘泉宮客來問著塞垣事時時撚箭送飛  
鴻西方太白光墮地中夜悲歌增意氣漢家定起李輕



車未用先誅灞陵尉

小城南吟

陳孚剛中

城南三月花亂開  
花間羯鼓聲如雷  
蟬衫麟帶誰家子  
笑騎白馬穿花來  
美人如花映碧水  
榴裙吹舞金鵲尾  
手折楊枝擲水中  
腰褭如弓送窮鬼  
人言此是上河梁  
蒲川羅綺春風香  
年年窮鬼送不去  
波心驚起雙鴛鴦  
蓮莖一寸綠芒短  
老盡碧桃春不管  
遊人醉歸夜迢迢  
十二天街御烟煖

吳宮子夜歌

紫貝樓闕鬱金香煖雲七十紅鴛鴦玉蟬笑擁霞綃裳  
星河不墮宮漏長綠尊灩灩麟髓泣露重花寒秋不濕  
飲歌一聲起雪濤海龍夾陛如人立誰知淺顰蛾半掃  
中有殘螢滿秋沼越兵曉踏西風來碧波一夜芙蓉老

東歸歌送鄭子經

陳旅衆仲

北風吹山蕉葉黃長亭野日寒荒荒驅車送子歸故鄉  
人生此處堪斷腸舊遊回首秋山下醉帽簪花同走馬

歡娛如此離別何華月芳年不堪把子今去矣來何時  
翠壺雲深那可知向來亦有燕山期子今去矣來何時  
分題得車遙遙送方叔高作官江南

車遙遙薊門路高麗驕馬不受鞭方郎得官上車去薊  
門南頭盧水流燕姬十五居酒樓彈箏唱歌折楊柳落  
日車前勸郎酒南陌行人往復來幾人得官似郎回郎  
車勿驅傷馬足車中本載連城玉車遙遙鄔子洲賣車  
買舡載旗鼓晴湖風輕聞棹謳

三笋吟

子經家藏三笋圖予作三笋吟以誌之

蜀妓椎壘如截肪  
鮫宮夜織青犀裳  
翰林待詔擅花竹  
硯屏春透宮雲香  
鑱根薦鮮玉生汗  
南風入林翠胎綻  
牙根冤血點點紅  
三鳳聲沈九秋晏  
太官金錡陳淳熬  
看圖未必殖爾曹  
饒夫煮簣政未熟  
見此豪奪君其弢

海獸蒲萄鏡歌

予友甫田鄭君子經家藏漢海獸蒲桃鏡乃

夾漈公故物也予為賦此

尚方老冶收精銅金膏玉水開瞳矐未央曉日低青桐  
六宮秋井生芙蓉當塗妖鬼弄神器銅人登車數行淚  
寶奩偶落長安市來與人間照珠翠凝陰空祭江心龍  
海雨夜入閩王宮胡僧合掌西溪翁屋上絳氣吹晴虹  
貝丘紫露堪作酒中有駒駝活欲走青絲結鼻莫去手  
龍女鮫童俟之久

秋婦詞贈王秀才

方積叔高

蟋蟀蟋蟀啼我幃明月皎皎當兩扉昨日雙星會河渚  
今朝秦郎當遠歸郎歸不與妾念彼去時身上衣身上  
衣慈母線常恐秋風吹秋風吹楊柳妾但辛勤養慈母

七夕詞

織女女有夫牛郎郎有妻可惜不相守夜夜河東望河  
西一歲纔一會會合一何稀吾聞河西有田郎可犁雲  
中織錦女有機胡不一耕一織長相隨長相隨無別離

吳山高題畫

吳山高吳水深吳人住宅在山陰吳僧更愛山頂好別  
掃白雲種瑤草吳山高何迢迢吳門日夜出春潮吳兒  
作舡住舡裏日日吳門弄潮水

桐花烟為吳國良賦

台哈布哈兼善

吳郎骨相非食肉朝采桐花洞庭曲洞庭三月桐始花  
千枝萬朶搖江綠吳郎采采盈頃筐寶之不啻瓊膏粟  
真珠龍腦吹香霧夜夜山房擣玄玉墨成誰共進蓬萊  
天顏一笑金門開河伯噴香飛木葉太守噓氣成樓臺

龍賓十二吾何有不意龍文八吾手芙蓉粉煖玻瓈匣  
雲藍色映彤墀柳玉堂退食春晝長桃花紙透冰油光  
筠管時時濡秀石銀鈎歷歷凝玄霜君不聞易水仙人  
號奇絕落紙三年光不滅又不聞唐生烏玉玦坡老當  
年書柿葉惜哉唐李不復見吳郎善保千金訣嗚呼吳  
郎善保千金訣

衛將軍玉印歌

武皇雄畧吞八荒將軍分道出朔方甘泉論功誰第一



將軍金印照白日尚方寶玉將作匠別刻姓名示殊賞  
蟠螭交紐古篆文太常鐘鼎旌奇勲君不見祁連山下  
戰骨深中原父老淚滿襟衛后廢殂太子死茂陵落日  
秋風起天荒地老故物存摩挲斷文弔英魂

分得城上烏送張兵曹

甘立允從

月落城上樓烏啼樓上頭一啼海色動再啼朝景浮馬  
鳴黃金勒霜滿翠羽裘烏啼在何處人生多去留

歸來三曲送李建中

傅若金與礪

月皎皎兮河漢長黃鵠在天兮招我以翱翔天氣涼兮  
夜未央援鳴琴兮託宮商商聲作兮風撼撼歸來兮天  
路杳渺不可以終極

月皎皎兮夜既寒白露下兮衣裳單南風一去兮何時  
還援鳴琴兮曲再彈曲再彈兮天地為秋歸來兮清都  
之上不可以久留

月皎皎兮寒風作猿啾啾兮怨鳴鶴常恐秋遂為冬兮  
羣物以蕭索援鳴琴兮忽不樂忽不樂兮思吾土歸來

兮山中之人不可以無父

琵琶怨

美人揮哀絃上客嘆蛾眉急響多悲思孰知心所悲感  
昔奉綢繆不言生別離誓將桃李顏結君長相思如何  
雙栖鳳中路忽乖睽不怨歡會難但恐恩愛虧含情冀  
回顧中曲多苦辭君子苟不聽賤妾亦奚為

白苧詞

白苧白白如霜美人玉手親自浣製作春衣宜短長春

衣成有時遠行歸無期願君著衣重愛惜風塵變白能  
為黑

秋夜長送方叔高

秋夜長長如歲長如歲尚可夜涼薄人不能寐羣鴈各  
南翔一鳬向北飛團團素明月流光照我衣當歌正激  
烈慷慨送將歸丈夫成名微亦足烏能終夜悲刺促  
秋月皎皎夜何長念君客遊思故鄉當壚美人惜年芳  
長夜起舞歌清商歌清商送急管為君酌美酒請君勿

辭滿夜長迢迢漏未終離思比之何時斷離思長夜猶短

秋夜曲

草木搖落鴈南飛文窗皎潔承月輝淒風入房露沾扉  
紅顏含彩垂佩幃簪金鳴玉揚舞衣蘭缸對耀照君帷  
遠行胡為未言歸

廣西謠

廣西謠一何悲水泠泠山淒淒寧逢猛賊過莫逢官軍

來徭賊尚可死官軍掠我妻與子

楊花曲

薩都拉天錫

燕京女兒十六七顏如花紅眼如漆  
蘭香滿路馬如飛翠袖籠鞭嬌滴滴  
春風淡蕩搖春心錦笙銀燭高堂深  
繡衾不煖鴛鴦夢紫烟紅霧天沈沈  
芳年可惜去如水春困著人倦梳洗  
夜來小雨潤天階滿院楊花飛不起

秋夜長

秋夜長青燈半爇玉漏未央雲葉颺  
影露華凝光老樹

驚鵲枯莎怨蜚幽人對景耿不寐西風一疊神淒涼我  
欲渡河無梁我欲濟津無航扳鱗附翼愧凡骨化金點  
石無仙方腰犀秉象兮我貌不揚刺蛟縛虎兮我機弗  
張有劒徒爾射斗牛有弓何由挂扶桑夜光明月孰辨  
昔鄒子黃河太華誰是今歐陽天高地大若無礙無處  
可著詩人狂西風再疊兮形無爾傷黃鵠可跨兮蒼虬  
可驤南箕可播兮北斗可漿庶不可以智力而致者惟  
命之常何聖賢亦不能免于厄者或毀于臧或畏于匡

然大人虎變有不可得而測者豈非尋常之中有築巖  
之傳釣磻之呂卧廬之亮納履之良者耶西風三疊兮  
聲始洋洋黃金滿地岩花香呼童重洗琥珀觴籬菊已  
露螯已霜樂天知命兮吾亦從此逝矣相與忘形于無  
何有之鄉也歌欲斷夜將半拔劍起舞無人伴却對姮  
娥影凌亂君不見芙蓉曉夢晚花酣有人却恨春宵短

芙蓉曲

秋江渺渺芙蓉芳秋江女兒將斷腸絳袍春淺護雲暖



翠袖日暮迎風涼  
鯨魚吹浪江波白  
霜落洞庭飛木葉  
盪舟何處米蓮人  
愛惜芙蓉好顏色

如夢曲哀燕將軍

芙蓉花為誰好  
洞房昨夜將軍老  
將軍老去空鐵衣  
漆燈照室人不歸

海子頭誰家樓  
繡簾半捲風悠悠  
行人謂是將軍府  
將軍不來罷歌舞

將軍容丹砂紅威  
風凜凜蓋世雄  
出門千騎塞行路  
今

日蕭蕭去何處

將軍功世莫比  
皇都甲第連雲起  
將軍一去空鎖門上  
馬臺邊無一人

折楊柳送方叔高

趙頤子期

楊柳青春水生借問行人行未行  
雕弓在弣馬騰櫪  
家住湓江江上城柔條好拂江頭路  
千縷萬縷牽情緒  
馬上郎君新得官  
阿誰解使留春住  
留春住春欲歸江  
南江北柳花飛  
柳花飛渡江水遮  
莫東風吹不起

楊白花

貢師泰泰甫

楊白花無定止昨日宮中飛今朝渡江水江水茫茫千萬里  
綿輕雪薄春旖旎把臂踏歌歌未已石頭城邊風亂起楊花  
白無定止

采菱女

落日照淮甸中流蕩回光窈窕誰家女采菱在橫塘風吹  
荷葉低忽見紅粉粧紅粧背人去驚起雙鴛鴦鴛鴦去復來  
烟水空茫茫

段節婦吟

河可塞山可移志不可奪義不可虧妾為段家婦年紀  
方及笄上堂奉翁姑入室攜兩兒兒死夫亦死此生將  
何為昔如雙鴛鴦今日為孤雌昔如三春花今日成枯  
枝寒風吹短髮明月照空帷百年在世能幾何父兮母  
兮不我知青天在上將誰欺

幼輿折齒歌

羅缺澗谷

秋衫未成錦機語棠梨半花鳳一羽象床雪縵小龍梭

細穴銀光吐冰縷西鄰郎君東海歸芙蓉半白杏雨肥  
十二闌邊說幽怨勸織南浦鴛鴦飛匿蘭含蕙無消息  
春醒丹霞漾玉色小龍呵出風雨聲奔騰觸裂雙白石  
白石國城三十六女子軍來兩城覆鸞歌猿嘯強激昂  
百戶風來如箭簇章臺公子真豪縱復以微言相感動  
郎君切莫更痴心忍作甘心可人痛

海樹歌

林缺羲元

江海之東龍君所都火精夜浴海波煖鬼仙催種紅珊

珊瑚樹老愁天吳中有海人長一尺別種雲根烏玉  
色卑枝交羅屈生鐵樹寒水鴉栖不得白龍魚服枝上  
嬉漁父舉網并得之動搖光怪龍女知鮫人泣血勞相  
思漁家入手不敢看沙頭棄之光撩亂老禪<sub>缺</sub>之挂苔  
壁三月坐看忘眠食蛾眉鐵樹琪林枝此樹一出空羣  
姿驚濤千里漬蒼潤龍筋不受秋風吹禪僧愛客勝愛  
樹持以贈客翻得睡青玉案明月璫不如報子露華章  
愁來思樹撫石床高歌一曲雲滿房天台鴈蕩長相望

聽琴歌

楊壽景熙

十八年少誰家女綽約容儀衣楚楚秋波潑潑映春山  
暫駐空刀裁白苧輕移蓮步出重幃玉纖閑理焦桐絲  
琳琅嫠女不足數前身疑是蔡文姬一鼓天風生再鼓  
山月明蒼龍夜啼老蛟泣孤鸞別鶴不敢鳴一絃宮牛  
鳴古盎應黃鍾二絃商梧桐葉落敲銀床三絃角野猿  
暮嘯岩花落四絃徵百轉黃鸝綠陰裏五絃羽洞庭蕭  
蕭落寒雨大宮小宮錯雜彈一堂魚水情交懽我聞此

聲重歎息歷代聖賢能作述杏壇千古有遺音何須更  
聽湘妃瑟

杏葉黃

張翥仲舉

杏葉黃杏葉黃蝴蝶雙飛來飛來東家牆東家女兒繡  
衣裳可憐蝴蝶惜流芳粧髻無心蘇合香起彈牀上箏  
自歌杏葉黃杏葉青時君去鄉坐見黃落思斷腸安得  
致之在我傍君不來天繁霜

寒漏明次韻王子常



寒漏明時一聆夜長不能寐月色明階庭西風落葉爭  
秋聲鷄啼未啼霜滿城城中有思婦正促征衣成東家  
西家砧杵急使我起坐時時驚歸心如廢弓屢折不可  
繫寒漏明時一聆

歲云暮矣三首送李五峯之溫州

歲云暮矣子將焉之江南木落鴻鴈飛娟娟美人淮水  
湄淮水去不止相思日千里

歲云暮矣子將焉往燕山雪片大如掌娟娟美人淮水

上淮水日夜流相思人白頭

歲云暮矣子將焉行江空木落天雨霜娟娟美人淮水  
旁淮水不回頭行人上蘭舟

青青水中蒲

青青水中蒲水落蒲根見無車可裹輪且織乘牛薦種  
蒲水中央夜雨生秋漲青青蒲根萍却居蒲葉上

乾坤清氣卷八

欽定四庫全書

乾坤清氣卷九

明 偶桓 編

古樂府

送別曲

察伋士安

瞳矐出扶桑照見大黑洋直升中天上萬國蒙清光三  
山樓閣蓬萊東丹霞翠壁金芙蓉鴻濛凝結古元氣我  
欲往遊從赤松剡郎朝玉京船開南風生海頭撾鼓人

起舞椎牛醺酒祈神明遠寄平安書十日到直沽阿翁  
髮半白莫醉黃公壚

履霜操

并序

楊維禎廉夫

琴操有履霜謂尹吉甫子伯奇為後母譖而  
見逐自傷而作也其詞曰朝履霜兮采晨寒  
考不明其心兮信讒言何辜皇天兮遭斯愆  
痛歿不同兮思有偏誰說碩兮知此冤使是  
詞果其出伯奇則伯奇不得希於舜矣

霜鮮鮮兮草萋萋兒獨履兮兒宿野田荷之葉兮葉易  
穿來亭花以為食兮食不下咽嗟兒天父兮天胡有偏  
我不父順兮父寧不兒憐履晨霜兮泣吾天

鴻門會

天迷關地迷戶東龍白日西龍雨撞鐘飲酒愁海翻碧  
火吹巢雙猱猱范增項莊照天萬古無二鳥殘星破月來天

隅座中有客天子氣左股七十二子連明珠軍聲十萬  
振屋瓦拔劍當人面如赭將軍下馬力排山氣卷黃河

酒中瀉劍光上天寒  
琴殘明朝畫地分河山  
將軍呼龍將客走石  
破青天撞玉斗

簫杖歌

為永嘉璣天則道人賦

空心勁草琅玕節瘦如筆枝赤如鐵壺公手中曾擲之  
黃公石上飛星裂璣天道人雙眼青見之不减九節藤  
神丁未窺混沌竅中有萬壑銅龍聲道人親鑿崆峒玉  
九漏玲瓏尺度足黑蛇飛來膝上橫道人髯中嘯鸞鵠  
自言奇音不敢作寒星墮地風折嶽去年臺山解虎鬬

今年狼山敲豸角鐵崖相見洞庭東腰間笛佩蒼精龍  
湘江雨脚吹雌風相呼道人木上座杖陂水拔鬚眉峯

蹋鞠篇二首

為劉娘賦

江南女兒花娟娟五花繡出葵花圓蹋花上下雙文鴛  
雙文鴛玉連瑣髻斜斜馬初墮

金鞭齊停馬上郎落花旋風掃毬場繡輪擲過東家墻  
東家墻噪雙燕平頭奴搖便面

苦雨謠

去年雨坍簾土今年雨沒竈釜竈釜三月青無烟官家  
火程不問雨胥靡移來坐監主旬申虧官走插戶

大風謠

大風起不終朝如何三日夜日日夜夜旋扶搖卷水覆  
我舟卷土覆我窰嗚呼太平玉琯將誰調五日一風不  
鳴條

五禽言

喚起喚起東方明門前已如市上林有鳥解司晨苦殺



蕭娘睡方美

提胡盧提胡盧沽酒何處沽  
烏程與若下美酒高無價  
小姑典金釵勸郎醉即罷  
君不見城中官長胡盧提  
十日九日醉如泥

姑惡姑惡姑不惡  
妾命苦姑有孝女  
姑為慈母妾亦甘  
為東海婦

子規子規子不歸  
白頭阿嬈慈且悲  
子弗歸待何時  
君不見西江處士章  
九華十年去赴丘園  
科母死妻啼未

還家

行不得哥哥我不行奈我何西山有豺虎西江有風波  
風波尚可壺豺虎尚可羅弩兒關平地多行不得哥哥

地震謠

至正壬午七月朔地震如雷民屋仡仡上出

毛如白絲紀詩一章章十三句

四月一日南省火七月一日南地震地積大塊作方載  
豈有壞崩憂杞人如何一震白毛茁泰山動搖海水洩

便恐崑崙八柱折赤子啾啾憂地裂唐堯天子居上頭  
賢相柱天如不周保國如甌馭民如舟吁嗟赤子爾何  
憂

金溪孝女歌

唐敬宗時撫之金溪有金銀場銀戶葛佑者  
輸銀不足監官黃慷榜佑垂死佑二女投銀  
冶中化銀二錠事聞遂罷銀場金溪與二女  
立廟至今血食危太樸有卷求余詩為賦孝

女歌云

金溪石石生銀鑿石石有盡銀令無時磷昨夜銀官下  
山頭點銀戶葛家父無丁惟二女葛家父苦楚苦楚與死  
鄰二女痛父關一身駢首跳冶烈焰閻烈焰焚二女不  
焚二女心天慘慘神森森化作雙白金雙白金盛龍錦  
願作萬壽卮以奉天子飲一飲銀鬼泣再飲銀令寢

箕山操為許生作

李孝光季和

箕之塚兮白雲幽幽箕之陽兮其木樛樛夫世之人兮

孰能遺我以憂雖欲從兮其路無繇朝有人兮來飯其  
牛

米蓮曲為魯子翬作

米蓮復米蓮蓮生隔江水不愁無舟楫但恐風浪起  
米蓮復米蓮水深不得歸兒饑須母哺當令阿誰飴

茅山謠送證上人

道人兩髻青如蓮大醉上山捫青天青天蕩蕩玉盤出  
引手舉盤天上懸銀河顛倒挂桂影長風吹香落丹井

地上小兒沾臘馥玉兔急擣玄霜熟仙家十二白玉樓  
夜半起看跋烏浴手招茅君叫列仙帶劍上立紅雲前  
茅君騎虎上天去道士乞我明霞篇

吳趨曲送薩天錫

四座竝清聽聽我歌狹邪狹邪不可聽聽我為爾歌吳  
趨美人珠襖貂諸于美人寶釵有九雛美人投我明月  
珠

采蓮曲送王伯循

采蓮江之南采蓮江之北采蓮何所有但采蓮中菰草  
聞別離苦當爾不願從前作相識縱令別離不復相憶

長干行

秋風從西來吹我庭前樹聞歡在揚州却向姑蘇住估  
客離長干教儂寄書去

太乙真人歌題蓮舟圖

銀河跨西海秋至天為白一片玉芙蓉洗出明月魄太  
乙真人挾兩龍脫巾大笑眠其中鳳麟洲西與天通扶

桑乃在碧海東手把綠雲有兩童掣鰲二鳥開金籠

歛硯歌

渴龍夜飲天池水六丁揮戈斷其尾黑風吹落歛山深  
化作玄精石中髓山深夜夜飛神光良工盜發天所藏  
鑿開蒼崖斲寒玉磨礪秋水歸文房元氣淋漓翠光濕  
松花香碎蟾蜍泣醉掃邨公五色雲倒鳳顛鸞秋瑟瑟  
誰能持此歸玉堂經天緯地成文章月中老兔吹寒芒  
與君同上青雲鄉



浣紗曲

張天英南渠

溪頭浣紗女素足弄清波綠窗費纖手鳴機不停梭織  
成絺與綌貴之如綺羅持此寄遠客思君心緒多

烏夜啼

城頭烏夜啼月白薊門時朝陽借光彩翱翔鳳凰池春  
風黃金樹結巢在高枝中心懷返哺還向故山飛

貞女吟

嘗聞漢宮人恩深妬還重自憐冰雪姿肯戀金屏寵春

風吹倒山妾心初不動羞死王昭君玉顏沒青塚

久別離送韶之西安

久別離長相思溪頭楊柳樹十見黃金枝枝長花飛如  
白雪心期暗結東風知東風吹花化為萍一夜浮游滿  
溪水滿溪水到天池萍亦因之幾千里何時萍實成與  
君乘舟泛蓬瀛

胡波斯引為丹陽氏作

查居廣廣居

紫鳳檀瓢剖鳴玉璘璘鏡面蚶蛇腹銀絲四索挂寒冰

中有驪珠三萬斛丹陽老人今樂師當筵一曲胡波斯  
太宰新聲變哈失曹綱縮手昭君悲捩軸抽絃彈曳樂  
歷亂金盤撒飛電貝宮月冷泣雌蛟瑤漢秋清叫孤鶩  
玉壺水咽銅龍哀繞指忽作盤空雪劒光迸火玉斗碎  
馬蹄飛蹴河冰裂洪牙促羽調聲轉壯士氣酣毛髮立  
蹋歌起舞勸一觴不惜花袍酒淋漓老人波斯技絕倫出  
入侯門三十春銀鸞半臂紫貂帽光動主翁筵上人繁  
華轉眼成今古獨技波斯向誰鼓歸來醉卧錦氍毹高

樓一夜梨花雨

夜寒怨

張天雨伯雨

貞白真人擬古樂府夜寒怨山學弟子用末  
語擬一解

夜寒生羣獸驚寂兮寥兮栖遁情陰宮漫漫落葉平岡  
頭霜月耿微明寒漏澁寒絃緊愁腸斷愁語盡人生異  
木石思來誰能忍

奔月卮歌

甕社明珠奔八月脫殼政似風蟬潔漁網出之不敢視  
滌盡含沙光不滅文昌四星吞在腹一一金晶大如菽  
唇物還來作飲器日夜雄虹亘茅屋一扇桃核寬有餘  
半葉蕉心卷未舒飲非其人躍入水怪雨盲風生座隅  
置之天上白玉盤斗柄挹酒長闌干李白跳下鯨魚背  
持勸我飲相交歡幽宮馮夷為予泣酌盡海水百怪立  
還我平生老蚌胎許君醉卧鮫人室

玉笙謠為鐵門笙伶周奇賦

我有紫霞想愛聞白玉笙懸匏比竹無靈氣昆丘采此  
十二莖鳳味銜明珠鳳翼排素翎金華周郎妙宮徵子  
晉仙人初教成月下吹參差羣雛亦和鳴緱氏山頭白  
雲起七月七日來相迎長謝世人一揮手飄下滿空驚  
鶴聲

月氏王頭飲器歌

釋大訢笑隱

呼韓款塞稱藩臣已知絕漠無王庭馳突猶誇漢使者  
縱馬夜出居延城我有飲器非飲酒開函視之萬鬼走

世世無忘冒頓功  
月氏強王頭在手  
帳下朔風吹酒寒  
凝酥點雪紅欄斑  
想見長纓繫馬上  
髑髏濺血如奔流  
手揮欲回斗柄轉  
河決昆侖注尊滿  
酒酣劒吼浮雲悲  
使者辭歡歸就館  
古稱尊俎備獻酬  
孰知盟誓生戈矛  
斬取樓蘭懸漢闕  
功臣猶數義陽侯

明鏡詞贈傅秀才

楊鑄季子

亭亭青銅鏡似月  
雲端缺無復照花顏  
輝光暗消歇憂  
來不欲近坐恐生白髮

時傳方悼亡

木綿花歌

胡缺父山

吳姬織綾雙鳳花  
越女製綺五色霞  
烟熏麝染臙粉氣  
落落不到山人家  
蜀江橦老鵲銜子種  
我南園趁春雨  
淺金花細亞黃葵  
濃綠苞微壓青李  
吐成秋繭不用繰  
回頭春箔真徒勞  
烏鵲滑脫茸核角  
弓絃緊翻雲濤  
揆掌玉筋光奪雪  
紡絡冰絲細如髮  
津津貧女得野蠶  
軋軋寒梭緯霜月  
布成不異白氍毹  
價重唾取青銅錢  
不須坐卧壚火上  
便覺挾纊春風前  
衣無美惡煖則一



木綿裘敵天孫織飲散金山弄玉簫風流未遜揚州客

鴻門宴

周權衡之

項王高宴鴻門北風雲奔走天為黑椎牛刺豹酒三行  
談笑戈矛生頃刻豈知天命非人謀玉玦三提事何益  
興亡楚漢兩干將開闔乾坤雙白璧喑鳴謾說萬人敵  
隆準天人竟誰識玉斗聲中霸業空烏江江水還流東

明妃曲

逝水無迴波去箭無返筈十載昭陽春萬里龍荒月塵

沙滿宮衣慘淡餘香歇哀絃濕絲淚盡絃亦絕寄語  
漢飛將此計誠太拙蛾眉豈長好不久為枯骨

長相思

高堂炯菱花鑑貌不鑑心何以寫貞素調彼綠綺琴初  
成別鶴操再作離鸞吟悵然邈佳期桃李青春深

湘中吟

離思溢冲抱遊子感年歲長洲藹芳杜湘雨濕行旆青  
林動江色杳杳白鳥逝歌騷佇高風誰與奠椒桂

輕薄篇

陳肅伯將

華駒細犢小香車城南陌上問倡家倡家窈窕可憐妾  
石榴裙裾飛蛺蝶零陵酒熟正宜嘗嬌歌一曲雙斷腸  
斂笑含顰背花燭眼意拂君君暫宿

相逢行

吳王城上啼春鴉吳王宮前多落花粉翠三千掩佳麗  
珠貂十萬歇豪奢昔余好遊錢塘里亦復結客來吳市  
炙魚插匕嗟盜雄下馬投金想公子浩歌長嘯出閭門

逢君意氣在一言解余芙蓉之寶劍勸君葡萄之玉尊  
余從山東入燕趙身歷河陽抵豐鎬當時然諾激肺肝  
今日還過盡懷抱風塵瀕洞生干戈世上英雄本不多  
男兒慎勿憂富貴富貴逼人將奈何

夜闌曲

陳樵君采

碧宇星回夜漫漫靈蕪烟煖重薰薦冷翠香銷青桂枝  
冰荷蓋光光繞帷花樓艷舞金菱蕤吳羹蜀酒精瓊糜  
酒闌半解龍綃衣春朝曲渚聞鷗鷄

七夕宮詞

內人拜月金鋪戶  
鳳宿梧枝秋葉下  
露華入袂玉階寒  
織署錦工催祭杼  
月下金鈿照骨明  
同心絲繪紅生縷  
素衣碧實上華樓  
夜開颼馭下銀州

海人謠

海南蠻奴髮垂身  
朝朝采寶丹崖裏  
夜光盈尺出飛魚  
柏葉收珠寒菹菹  
幽箔連錢生綠花  
切玉蠻刀如切水  
九譯來朝萬里天  
北風不動琅玕死

出塞曲

為戍潼關李總管賦

鐫鏤夜啼光屬地將軍一出櫬槍死行塵不動人歸市  
帶甲如雲自天至取君甲兵為君洗分明袖有銀河水  
手中遺下泥丸不封函谷封泰山

長安有狹斜行

長安有狹斜方駕秦中客云自牛丞相來自薄家宅薄  
家萬戶侯朱門暎椒壁長楸車馬來賓客御瑤席金屋  
貯尹邢阿嬌淚沾臆燕燕慵束妝繁華照春色轉蕙光

風翻趙帶徘徊月到班姬牀  
班姬輟芳翰紈扇從風揚  
明妃鬪百草玉環御雲裝  
向來溫柔地盡入白雲鄉  
何以慰王孫琵琶隨驕驕  
何以奉燕燕罷舞歌慨慷  
何以奉明主綠珠奏清商  
嫫母挾無鹽搔首愛宮粧

公莫舞

項炯可立

龍蟠錦帳金奕奕虎旗無際人馬立  
肉林垂益陵阜赤  
萬甕行酒晴虹濕大蛇中斷狂魄滅  
重瞳無光射寶玦  
雷憤風愁三尺鐵  
河山未必如瓜裂  
老荒猝珥語公莫

頭上青天懸日月

吳宮怨

繡楹洒黃粉椒壁漲紅青倚檐樹如鬼深草地夜鳴  
鵲體已無淚古恨埋石扃

鶴臯辭贈張鍊師

吳克恭寅夫

吹笙王子晉鍊鼎茅初成清秋金穴遊白羽雲中行五  
烟隨露掌太霞乘火精高歌落渺茫逸氣凌紫清時飲  
玉池水朝餐珠樹英追隨神雀舞低昂威鳳鳴如何九



臯上託子以脩名

楚人弓

陸居仁宅之

楚人弓懸兩石五十萬矢陷強敵絳人弓箭三隻長歌  
入關成偉績多箭不如少箭力制敵若在弓矢間鳴條  
牧野高如山

春華蛺蝶謠

鄭元祐明德

花魂迷春招不歸夢騎胡蝶江南飛碧蕤粉香飛不起  
卧帖芳茵唾鉛水痴娥眼嬌錯驚顧解裙撲蝶濕寒露

折釵搔首笑相語何人芳心共栩栩  
頰雲流光空影寒  
冰絃結恨啼闌干

鬻石篇

張簡仲簡

山中學仙人斷穀自有方  
泌水生石精鬻之以為糧  
候火中夜起松林襲馨香  
切以昆吾刀間以瓊華漿  
長生尚服食玉體生光芒  
一朝凡骨換白日凌風翔

周郎玉笙謠

我嘗躡輕鴻浮雲度瑤闌  
醉看碧桃花吹笙弄明月  
仙

人王喬董雙成為作春水流花聲昆侖十三鳳飛舞相  
和鳴曲終飄然上鶴去逸韻散落天風清自從失脚墮  
塵世飛夢尚繞芙蓉城浮丘公今不見白玉龜臺走雷  
電雲和妙曲杳無聞萬壑松風洗清怨

鴻門歌

夏溥大志

大風揚兮赤雲屯楚人望氣皆龍文當時吾甚笑亞父  
幸至彭城疽背死誰云沐猴竟遭烹汝乃盛怒咤孺子  
嗟哉拔山之力不可得扶義而西取天下者以三尺君

看項王重瞳舜重瞳天命乃在隆準公

吳山謠和廉夫

中興過江笑諸人二十三表哀老臣倡和國事可斬檜  
馬上青衣竟何在采石未靖瓜州驚戰功今乃歸儒生  
第一峰前誰立馬夜箭射血來帳下

妾薄命

宋元子虛

雲母屏琢春冰鮫女織綃蟬翼輕比妾妾薄命比君君  
薄情紅綿拭鏡照膽明還疑妾貌非傾城傾城從來有

人妬况復君心不如故故人心尚峰九疑新妾那能無  
故時補天天高填海海深不食蓮葍不知妾心

古硯歌

神媧踏雲補天去遺下一團蒼黑天千年萬年乾不得  
長帶盤古青紫烟玉工割天天化石石內星精有餘魄  
瑠光發炯成禹壁海王川后輸玄液帝青呵霧坤倪濕  
匣月不開太陰泣破天殘缺無人補一穴縹緗漏春雨  
空藏老石磨古今補天何時與天語

櫻桃詞

失名

江南四月春歸早紅紫千枝迹如掃枝頭新綴纓絡珠  
一樹櫻桃爛晴昊菱花照見白家娘一顆胭脂相鬪好  
青樓遠客迷芳草三食櫻桃送春老鳳凰在何方銜將  
飛遠道

乾坤清氣卷九

欽定四庫全書

乾坤清氣卷十

明 偶桓 編

古樂府

大姑謠

鄭洪君舉

大姑嫁將軍小姑未有夫  
小姑兩脚泥大姑滿頭珠  
前月小姑去嫁作庄家婦  
釵削鬢下荆衣裁機上布  
大姑嗔小姑生憎兒女痴  
多少馬上郎偏愛牧羊兒  
八月點

軍卒將軍玉門出大姑說夫婿上馬快如鶻昨日邊報  
歸大姑淚如揮郎君馬上死無處寄征衣連理與枯枝  
雙飛成戢翅都無百夜思浪作千歲計小姑庄上來瓦  
盆雙鯉鮓上堂拜父母夫婦恣歡諧大姑見小姑珠翠  
無顏色低頭怨悵天仰天呼不得人生百年良所無白  
頭相送真良圖東家女郎欲嫁夫切莫猖狂學大姑

城上烏為李僉憲賦

城上烏尾畢逋雄飛啞啞雌者呼下飲九曲之清池上



集百尺之高梧烏鳥一巢生九雛去年築城興萬夫家  
家力役到妻孥使君勗我我力痛烝豚滿筐酒滿壺作  
勞耳熱歌嗚嗚今年城堅如鐵石弩臺侵弓土花碧白  
雲為藩樹為戟朱旗星流落日赤馬鳴蕭蕭人寂寂六  
門虎賁晨晏食城頭高高如屋極烏朝出飛暮來息雌  
雄哺雛乳而翼城上烏畢逋尾九雛羽翼成飛去青雲  
裏江南無好樹處處烽烟起危枝繞遍不堪栖昨日歸  
來舊巢底使君青驄馬繫在垂楊下手中金僕姑不驚

城上烏思情雙飛鳥遺愛在中吳使君去幾時回新城  
高百雉仰德竝崔嵬

飛來孤送奎師住靈鷲

張憲思廉

君不是唐林夫我不是眉山蘇如何臨行索我歌驪駒  
借君二十四節之龍鬚擊我迎風寒露之玉壺聽我歌  
爾飛來孤嵌嵌疑疑天下無左擁羅剎江右抱西子湖  
靈峰秀出五百尺嘉樹玉立三十株香林冠其顛冷泉  
濯其趺晴嵐盡掩西子慢寒月夜上摩尼珠馴麋或墮

猛虎下山鬼戲荅黃猿呼千蹄鐵騎亂戎服五丈大旗  
屯梵區方舟子休悵快龍節杖且載途明年二月春風  
裏花外馬蹄知是吾

新嫁娘

盧昇廷舉

新婦調羹湯小姑繡衣裳新婦不停手小姑不下床新  
婦語小姑爾亦不自量爾年二八餘寧久阿母傍請看  
繡針底文彩雙鴛鴦春風一朝起持贈畫眉郎爾姑別  
我去如我事姑嫜

自君之出矣

郭翼義仲

自君之出矣花開又花謝思君如日月耿耿復晝夜

自君之出矣徒守零落耳思君如車輪輾轉愁不已

自君之出矣琴瑟何曾御思君如落葉蕭瑟悲秋暮

五禽言

布穀布穀催布穀去年官軍糧不足里正輸糧車輓輓  
六月長枷在牢獄今年穀種未入泥布穀早催須早啼  
蘆戛戛蘆戛戛沙場盡樵伐樵人指禿山無枝柢嗟嗟

鳳凰無處栖  
鷦鷯何處巢  
一枝

鍛磨鍛磨麥熟農夫餓  
家家無麥還租課  
年年濕麥五斗租  
一石晒乾量不過  
磨子不鍛竈不燒  
門前誰呼婆餅焦

秦吉了秦吉了  
人言汝是能言鳥  
嘲啁觜舌長賣弄  
言語巧野人張羅  
在林杪富貴一落  
樊中羈不如兩翅  
盤天嬉

快活快活不快活  
茫茫海洋濶白日  
槍刀來檢刮風火

轟天滿街殺道傍死屍鴉啄腥汝雖快活何忍鳴

小姑謠

小姑年可十五餘幼小只依兄嫂居爹娘愛惜不肯嫁  
婀娜一朶紅芙蓉大嫂含笑向小姑小姑今年當嫁夫  
嫁夫須嫁田家兒莫貪滿屋金與珠不見東家樓上女  
去年嫁作軍中婦良人戰沒招魂歸日日靈前哭如雨  
今年再嫁花娉婷車馬滿街相送迎寧為守義泉下鬼  
如何失節須臾生田家種田雖苦辛百年貧賤可終身

荆釵布裙灰土面小姑歸來好相見

今日行

鄭東李明

昨日去今日來明日忽忽復相催  
百川赴海何時迴思之竟不令人哀  
傳聞三神山海水青如苔五雲凌亂聞  
樓臺中有長生不死藥仙人青髮紅玉腮  
此事不許人間有錢鏗古人骨亦朽骨亦朽  
勸君酒長使金盃在君手

昆城吳歌

昆城吳水三萬頃吳兒招我入溟津舉頭看月月在頂  
手弄荷花落天影酒酣起舞船底眠青天作衾毛骨冷  
龍女欲出聽我歌扇以涼颼吹夢醒初歌音簇含清勻  
忽然疾走銜枚軍百怪髮立皆驚奔龍女舞翻巫峽雲  
再歌壯以悲鳳凰背泣麟洲啼六月雪壓昆侖低我歌  
三發滄海裂綠水欲變黃塵熱龍女聞之悲哽咽旌旗  
忽動龍女歸金烏飛上若木枝暑炎如火炙我肌嗟我  
老病力莫支千金莫致南海犀沈書問龍女遺我蒼水



壁與君乞取半湖白歸向高堂挂空壁

君住耶溪南

陳基敬初

君住耶溪南我住耶溪北咫尺不知名采蓮始相識君  
愛蓮有花我愛蓮有實花實本同根君心勿相失

望潮曲

鄭韶九成

夕風吹白波江樹搖綠烟行人望潮水心與滄溟連扶  
桑東來三萬里曉看浴日重淵底乃知碧海與天通只  
隔銀河一絲水美人住在東海頭身輕嫁與千戶侯頻

年轉粟直沽口  
檣頭夜夜望牽牛

春江曲送唐閔之入閩

二月春草青  
三月春水肥  
楊柳蕩洲渚  
蝴蝶作團飛  
美人向何處  
望望隔烟霧  
迢遞越王城  
青山海中樹  
海水高入天  
上與銀河連  
相思瘴雲合  
目送南飛鷺

賦三色梅花吟

范立叔中

姑射肌膚白  
于雪夜出瑤臺  
看明月羅浮  
仙人醉臉丹  
笑跨彩鸞下  
銀闌相逢同  
過金母家  
金母小玉名  
凌華

一色羅衫染蜜褐仍帶絲囊盛紫霞珊瑚鉤起真珠箔  
玉笛吹殘風色惡羣仙齊怨老容華斑斑淚向鮫綃落

見羣龍歌

辛丑夏至日作

徐孝基立本

玄雲崔嵬半空黑大龍蜿蜒小龍直天瓢倒瀉銀河懸  
海氣空濛海波立須臾復有三四龍威稜氣勢如羣雄  
雷公擊鼓玉女笑飛烟烈焰飄長風維時一陰凝下土  
六龍在天啓坤戶陽剛奮發無停機久旱終當沛甘雨  
我方扁舟湖上行見之頓覺雙眼明茫茫真宰不可詰

乃知龍物能通靈君不見葉公好龍妙圖畫一朝忽有  
真龍下可憐辟易走且驚不識真龍足悲咤

去婦詞

鄭采季亮

敝衣尚可澣古鏡尚可磨郎心一昏蔽反復將奈何緬  
懷初嫁時同心指江河江河固上流郎恩中道休娟娟  
芙蓉花託根在芳洲驅妾出門去妾身將焉求安得明  
月珠置之郎心頭

龍王嫁女辭

于立彥成

東方龍王嫁龍女雷車彭彭載風雨神奸夜邀髑髏語  
碧草無光愁露渚幽宮沉沉精爽入鸞裾行烟翠痕濕  
阿鬟嬌小不成粧帝與桑田作湯邑胭脂紫玉吹海腥  
陽侯擊浪玻璃聲湖邊地皮薄如紙長堤卷作長河水

### 短歌行

白日苦易短百歲良非長今日花間露明朝葉上霜黃  
河無停波浩浩東入海弱水隔神山靈藥何由采羲和  
攄六轡蒼龍挾其輶回車謁王母蛾眉生素秋虞淵沈

莫景忽在扶桑顛孰知青天上年年莖神仙尊中有美酒  
激灩浮春香調笑青霞侶娟娟紫雲娘今日不飲酒  
奈此白日何來者日益少去者日以多太極那能窮混  
沌不可補不如醉鄉人一息同千古誰云刀圭藥可以  
養神骨天運未可期且盡杯中物

病駝行

高啟李迪

駝峰黃駝茸紫曾馱黃金獻天子燕山雪深沒駝耳錦  
韉模糊駝不死去年從軍下南粵粵江水渾沙草熟毛

焦肉枯骨欲折回頭却憶燕山雪  
燕山雪不得歸馳饑  
馳渴誰與知伶仃反被牛馬欺  
嗚呼馳兮爾勿悲爾峰  
可食茸可衣利爾衣食孰爾醫

乙巳寒食吟

袁舉仲徵

香風吹面東方來櫻桃花發柳眼開  
鸞簫聲歇幽蘭笑  
十二樓前青雀斗王母騎龍愁  
莫雲碧桃過眼三千春  
北山佳城久無主寒食心摧淚如雨  
自驚髮薄不勝梳  
心事波搖為誰語

白苧詞送謝叔久

鄭基本初

征鴻至征旆舉花發芙蓉滿江渚吳姬約雲歌白苧凝  
為朝雲向君舞牽絲鳴玉張宴遲稱觴聽曲心自怡君  
之別會有期

折楊柳

錢惟善思復

何處好楊柳攀條送遠行花飛渡江水客醉踏歌聲秋  
色悽榆塞春陰接鳳城一枝不敢折為近亞夫營

洛陽陌



驅車洛陽陌周道何逶遲玉帛走侯甸金湯固城池潘  
令好桃李阮生多路岐銅駝卧荆棘索靖獨先知

新街曲

徐士榮仁則

東街南曲聲婉揚西街北曲聲激昂佳人唱曲不下樓  
樓下白馬青絲韁昨日開筵擊鼉鼓今夜合席調笙簧  
樂聲一似曲聲雜人意豈如物意長祇恐樓上人春光  
不長好寧知馬上郎金縷非重寶向來恩愛江水深一  
旦殘花與哀草

將軍歌

張樞夢辰

將軍走馬沙草場  
獐龍蹠蹠鷹飛揚  
狡兔之窟四顧無  
所藏  
置置如雲箭如雨  
滿眼禍機寧脫此  
將軍一日權  
豈直百兔死君不  
見李斯非相才上  
蔡東門遊獵子

柳風蓉月亭吟和韻

袁華子英

綠烟紅霧搖蘭塘  
嬋娟泣露啼秋芳  
金蟲撲帳花風熱  
花底雙歌蹋明月  
畫橋十二懸妖虹  
美人香骨胭脂紅  
滿眼春嬌小蠻舞  
雲錦書傳青鳥語  
亭中主人江左客

春草夢回江月白

從軍行

瞿榮智惠夫

年少去從軍妻兒生死分  
弓開孤月影劒動七星文  
解識風雲氣能穿虎豹羣  
不將身許國何以樹功勲  
破敵三營外城頭日欲低  
舉烽連磧遠戰氣接雲旌  
幟驚鳥起鐃簫雜馬嘶  
祇愁千里月少婦正悲啼

挂劍操

秦約文仲

魯邦是聘兮魯彊孔壬王命肅將兮徒御如林徐君觀

止兮話言欽欽顧我劒兮眷愛彌深我歸魯兮徐亡我  
謀死生不忘兮鬼神是臨嗚呼我其挂劒兮庶昭我心

鴻鵠操

粵鴻鵠兮舉翮高飛戾霄漢兮矰繳遠而彼河山兮險  
阻是依建邦國兮晉實肇基濟夫河兮浮舟以楫治夫  
國兮匪士伊說顧鴻鵠兮其言凌厲嗟若人兮我心孔  
說

江雨謠題偶武孟江雨軒

陸仁良貴

白龍祠前江水綠江上何人吹紫竹江妃清怨不能降  
散作浮雲滿江曲浮雲忽變江雨來亂撥驪珠三萬斛  
天昏地黑若混沌鐵馬交馳龍戰陸初疑巴陵走急湍  
復訝匡廬瀉飛瀑鮫人停機那敢織馮夷揚波自起伏  
須臾靜聽寂無聲嫋嫋如絲成霖霖長江直截東海邊  
夕陽照向江頭屋滿村父老起歌謠穠稔今年秋雨足  
幽人開軒舉醺醪正愛晚來涼氣肅我今下榻軒中宿  
幾時更剪西窗燭

憶別曲

來時蘼蕪青歸時蘼蕪黃楊柳蕭瑟鳴蜩螳帖帖高飛  
鴈南翔鴈南翔懷故鄉夫君遠在婁之陽玉壺青絲唱  
窈窕荷花落日棹相將

玉佩謠

吾衍子行

昆吾剪月吹香風鸞絲貫縷聲瓏瓏珠華闌珊舞回步  
宓妃催喚蓬萊宮聯翩鳳帶春風碎曳雨搖雲楚腰醉  
仙人琪樹生晚寒洞中敲折青琅玕

古采蓮

濕風吹花生冷香馮夷為舞冰綵裳霏霏粉金飄晚塘  
浮蘭舟鼓桂楫歌采蓮為君發遲遲歸來弄明月

洛城曉

洛陽曉氣浮春空花風漾煖香濛濛油車碧鈿金駟裊  
染露蹴烟移海紅回廊複宮洞房隔夢入瑤臺買春色  
疊柳蛾眉蜀帳昏謾識銅駝錦香陌鸞悲鏡舞秋茫茫  
簾移日光春晝長春晝長恨春草蝴蝶飛來鬢先老

孔子琴操四首

王逢原吉

去魯作

汶泗交流兮龜蒙相繆兮鬱乎尼丘兮禮樂賜自周兮  
大夫好脩兮吾將返吾輶兮

過匡作

文王徂兮道在予兮天蓋常時則渝兮二三子毋徐徐  
兮伊草露之濡兮

去衛作



我行于衛有淇湯湯彼或知本伊流則長載亶載徊禾  
黍芒芒匪邶子傷武公其亡

厄陳作

天地塞兮日月食兮君子厄兮周公云遠心不知所底  
極兮

趙氏二女辭

遊鯉山石高孱顏遊鯉溪水清洄灣中有我我青髻鬟  
望如春雲不可攀壬辰仲冬寇蜂起乳臭將軍先披靡

民人顛連社稷圯我固當為貞白鬼後來小妹復被驅  
亦葬魚腹全其軀山高水清幾千載虹月夜貫雙驪珠  
夜深鮫宮屏機杼風吹草寒觸體語何由生長江沱間  
及見王睢鼓衣羽願回堯天行化日女子有家男有室  
地下甘心燈似漆

答女臺歌

熊夢祥自得

在京南城放生池東高三丈蒿草茫茫鄉老  
俱稱金蕭后答女於上

荒草堆燕人號為笞女臺金源蕭后飾宮女表正壺範  
出聖裁此事庸或有史筆獨不該繁華若流水去者不  
復回後人見遺跡孰不興遠懷閒花野草今猶昔當時  
美人安在哉

丁都護

樞密三知院達爾瑪戢總戎曹州進兵陷陣  
諸將卒士棄其主將而潰於是被害甚慘後  
以十月末旬獲其骨而歸招魂于順承門外

丁督護郎上馬將星煌煌干戈戚揚貌貅百萬羽林郎  
旌旗所指孰敢當丁督護郎下馬穹廬滿野笑言啞啞  
良家女兒擊玉竿夜來葉落消長夜丁督護郎進兵旗  
電鼓霆澤劍流星指麾衛軍歌楚聲主將傾危血刃腥  
丁督護魂來歸少妻嬌兒涕泗漣而去時鞍馬何人騎  
肘後玉印今歸誰嗚呼猗戲國之梁棟哲人姜姜

乾坤清氣卷十